

四庫全書

集部

欽定四庫全書

御選唐宋詩醇卷四十一

眉山蘇軾詩十

目錄

同正輔表兄游白水山

與正輔遊香積寺

次韻正輔同遊白水山

章質夫送酒六壺書至而酒不達戲作小詩問之

雨後行菜

殘臘獨出二首

錄一首

新年五首

錄一首

次韻高要令劉湜峽山寺見寄

惠州近城數小山類蜀道春與進士許穀野步會
意處飲之且醉作詩以記適參寥專使欲歸使持
此以示西湖之上諸友庶使知余未嘗一日忘湖
山也

食荔支二首

錄一首

遷居

兩橋詩

東新橋

西新橋

白鶴峰新居欲成夜過西鄰翟秀才二首

縱筆

種茶

白鶴山新居鑿井四十尺遇磐石石盡乃得泉

三月二十九日二首

吾謫海南子由雷州被命即行了不相知至梧廼
聞尚在藤也旦夕當追及作此詩以示之

行瓊儋間肩輿坐睡夢中得句云千山動鱗甲萬
谷酣笙鐘覺而遇清風急雨戲作此數句

次前韻寄子由

遷居之夕聞鄰舍兒誦書欣然而作

觀暴

糴米

擷菜

次韻子由月季花再生

次韻子由浴罷

十二月十七日夜坐達曉寄子由

子由生日

以黃子木拄杖為子由生日之壽

儋耳

新居

倦夜

縱筆三首

錄一首

貧家淨掃地

庚辰歲人日作時聞黃河已復北流老臣舊數論

此今斯言乃驗二首

錄一首

庚辰歲正月十二日天門冬酒熟予自漉之且漉

且嘗遂以大醉二首

錄一首

汲江煎茶

予來僂耳得吠狗曰烏菴甚猛而馴隨予遷合浦
過澄邁洄而濟路人皆驚戲為作此詩

澄邁驛通潮閣二首

六月二十日夜渡海

次韻王鬱林

藤州江下夜起對月贈邵道士

廣倅蕭大夫借前韻見贈復和答之二首 錄一首

次韻韶倅李通直二首 錄一首

李伯時畫其弟亮功舊隱宅圖

贈嶺上老人

予昔過嶺而南題詩龍泉鐘上今復過而北次前

韻

過嶺二首

留題顯聖寺

歇白塔鋪

鬱孤臺

次韻江晦叔二首

錄一首

寒日與器之游南塔寺寂照臺

贈詩僧道通

予昔作壺中九華詩其後八年復過湖口則石已
為好事者取去乃和前韻以自解云

次韻郭功甫二首

錄一首

宋復古畫瀟湘晚景圖三首

嘲子由

第五橋

軒牕

魚

欽定四庫全書

御選唐宋詩醇卷四十一

眉山蘇軾詩十

同正輔表兄游白水山

偉哉造物真豪縱攫土搏沙為此弄擘開翠峽走雲雷
截破奔流作潭洞因隨化人履巨迹得與仙兄攝飛鞚
曳杖不知巖谷深穿雲但覺衣裘重坐看驚鳥救霜葉
知有老蛟蟠石甕金沙玉礫粲可數古鏡寶奩寒不動

念凡獨立與世疎絕境難到惟我共永辭角上兩蠻觸
一洗胸中九雲夢浮來山高回望失武陵路絕無人送
筠簞擷翠爪甲香素纒分碧銀餅凍歸路霏霏湯浴暗
野堂活活神泉湧解衣浴此無垢人身輕可試雲間鳳
直從瀑布發處寫到波平水靜與前佛跡巖詩別是一
般境界游跡不同詩亦隨異可知絕唱高蹤不由強索
而得

與正輔遊香積寺

越山少松竹常苦野火厄此峰獨蒼然感荷佛祖力茯
苓無人採千歲化琥珀幽光發中夜見者惟木客我豈
無長鏡真贗苦難識靈苗與毒草疑似在毫髮把玩竟
不食棄置長太息山僧類有道辛苦嘗谷汲我慙作機
春鑿破混沌穴幽尋恐不繼書板記歲月

真贗疑似之難辨偶借採藥以發長歎其感人者微矣
次韻正輔同遊白水山

祇知楚越為天涯不知肝膽非一家此身如綫自縈繞

左旋右轉隨縲車誤拋山林入朝市平地咫尺千褒斜
欲從稚川隱羅浮先與靈運開永嘉首參虞舜款韶石
次謁六祖登南華仙山一見五色羽雪樹兩摘南枝花
赤魚白蟹箸屢下黃柑綠橘遵常加糖霜不待蜀客寄
荔支莫信閩人誇恣傾白蜜收五稜細斲黃土栽三桠
自注正輔分人參蹄種韶陽來詩本用礪字
惠州無書不見此字所出故且從木奉和朱明洞裏
得靈草翩然放杖凌蒼霞豈無軒車駕熟鹿亦有鼓吹
號寒蛙仙人勸酒不用勺石上自有樽壘窪徑從此路

朝玉闕千里莫遣毫釐差故人日夜望我歸相迎欲到
長風沙豈知乘槎天女側獨倚雲機看織紗世間誰似
老兄弟篤愛不復相疵瑕相攜行到水窮處庶幾一見
留子嗟千年枸杞嘗夜吠無數草棘工藏遮但令凡心
一洗濯神人仙藥不我遐山中歸來萬想滅豈復回顧
雙雲鴉

離却白水別作虛空縹緲之想層巒疊浪興會淋漓屈
子遠遊之遺也

李必恒曰雙雲鴉似指失偶事先生前迎正輔詩有
萬里倘同歸兩鰥當對耨之句自注某喪婦已三年
矣正輔近亦有亡嫂之戚故云洗濯凡心及萬想滅
二語可見雲鴉即所云雲鬟鴉鬢矣

章質夫送酒六壺書至而酒不達戲作小詩問之
白衣送酒舞淵明急掃風軒洗破觥豈意青州六從事
化為烏有一先生空煩左手持新蟹漫繞東籬嗅落英
南海使君今北海定分百榼餉春耕

青州烏有偶然拈作對偶集中尚有以通印子魚對披
綿黃雀以日斜庚子對歲在己辰並為宋詩人所稱其
實軾詩卓絕處不盡在此

復齋漫錄曰文之所以貴對偶者謂出於自然非假
於牽強也王禹玉元豐間以錢二萬酒十壺餉呂夢
得夢得作啟謝之有白水真人青州從事禹玉歎賞
為其切題至若東坡得章質夫書遺酒六瓶書至而
酒亡因寄詩云豈意青州六從事化為烏有一先生

二句渾然一意絕無斧鑿痕更覺有功

詩人玉屑曰天下未嘗無對東坡以章質夫寄酒不至作詩云豈意青州六從事化為烏有一先生或以綠研寄楊誠齋為人以柏木簡換去誠齋用此意作詩謝云如何綠玉含風面化作青銅溜雨枝二事可為奇對亦善用坡詩也

雨後行菜

夢回聞雨聲喜我菜甲長
平明江路濕並岸飛兩檣
天

公真富有乳膏瀉黃壤霜根一番滋風葉漸俯仰未任
筐筥載已作盃盤想艱難生理窄一味敢專饗小摘飯
山僧清安寄真賞芥藍如菌蕈脆美牙頰響白菰類羔
豚冒土出蹠掌誰能視火候小竈當自養

質而實綺癭而實腴得陶公田園諸詩神髓

殘臘獨出二首

錄一首

江邊有微行詰曲背城市平湖春草合步到栖禪寺堂
空不見人老稚掩關睡所營在一食食已寧復事客來

豈無得施子靜掃地風松獨不靜道我作鼓吹

通首酷寫靜境結云風松獨不靜此是反托之法元微
官奧妙處可尋

容齋三筆曰東坡初赴惠州過峽山寺不值主人故
其詩云山僧本幽獨乞食况未還雲碓水自舂松門
風為關石泉解娛客琴筑鳴空山既至惠州殘臘獨
出至栖禪寺亦不逢一僧故其詩云江邊有微行詰
曲背城市平湖春草合步到栖禪寺堂空不見人老

稚掩關睡後在僮耳作觀碁詩記游廬山白鶴觀觀
中人皆闔戶晝寢獨聞碁聲云我時獨游不逢一士
誰歟碁者戶外屨二不聞人聲時聞落子其寂寞冷
落之味可以想見句語之妙一至於此

新年五首

錄一首

曉雨暗人日春愁連上元水生挑菜渚煙濕落梅村小
市人歸盡孤舟鶴踏翻猶堪慰寂寞漁火亂黃昏

次韻高要令劉湜峽山寺見寄

新聞妙無多舊學閒可束猶當隱李主未遽逃梅福空
腸吐餘思靜似蠶綴族寸田結初果秀若銅生綠荆棘
掃誠盡梨棗憂不熟高人寧鑄金下士乃服玉君看嶺
嶠隘我欲巾笥蓄曾攀羅浮頂亦到朱明谷旋觀真歷
塊歸卧甘破屋故人老猶仕世味薄如穀偶從越女笑
不怕蠻江浴驚聞尺書到喜有新詩辱應憐五管客曾
作八州督骨銷讒口鑠膽破獄吏酷隴雲不易寄江月
乃可掬遙知清遠寺不稱空明腹蹇驢步武碎短瑟絃

柱促仰看泉落佩俯聽石響轂千峰瀉清駛一往無回

躅狂雷失晤語過電不容目要知僧長飢正坐山少肉

人間無南北蝸角空出縮仇池九十九

自注仇池有九十九泉余嘗夢

至有詩

嵩少三十六

自注子由近買田陽翟北望嵩少甚近

天人同一夢仙

凡無兩錄陋邦真可老生理亦麤足便回熱天焰長作

照海燭

自注黃魯直寄詩云蓮花合裏一寸燭北馬海中燒百川魯直蓋近有得也

雋語清談引人入勝而竟體裁對絕不見排比之迹故

由筆妙應憐五管客曾作八州督二句宋援則引莊

子上有五管之說李原則引韓詩五管編歷之句王注兼採而並錄之古人之虛衷如此援說誠為未當李必恒補注是李原而非宋援可也其所作王注正偽直斥王注為杜撰是沒其實矣至魯作八州督句李原但引晉書只能解釋字面此則補注得之然觀軾賀子由生第四孫詩結云早謀二頃田莫待八州督有自注云吾前後典八州此乃八州督三字之確注補注但引八州憐我往來頻之句猶未為得也

惠州近城數小山類蜀道春與進士許穀野步會
意處飲之且醉作詩以記適參寥專使欲歸使持
此以示西湖之上諸友庶使知余未嘗一日忘湖
山也

夕陽飛絮亂平蕪萬里春前一酒壺
鐵化雙魚沉遠素
劍分二嶺隔中區
花曾識面香仍好
鳥不知名聲自呼
夢想平生消未盡
滿林烟月到西湖

渥采流熹觸物圓覽夢想之切洋溢於詞端

冷齋夜話曰韓子蒼曰丁晉公海外詩云草解忘憂
憂底事花含笑笑笑何人世以為工及讀東坡詩云
花曾識面香仍好鳥不知名聲自呼便覺才力相去
遠矣

風月堂詩話曰東坡南遷參寥居西湖智果院交遊
無復曩時之盛作湖上絕句云去歲春風上苑行爛
窺紅紫厭平生而今眼底無姚魏浪蘂浮花嬾問名
城隈野水綠逶迤裊裊輕舟掠岸過欲採芸蘭無覓

處野花汀草占春多詩既出遂坐譏刺得罪返初服
軾惠州答參寥書曰專人遠來辱手書并示近詩如
獲一笑之樂數日喜慰忘味也某到貶所半年凡百
粗適更不能細說大畧祇似靈隱天竺和尚退院後
却在一箇小村院子折足鐺中菴糙米飯喫便過一
生也得

食荔支二首

錄一首

羅浮山下四時春盧橘楊梅次第新日啖荔支三百顆

不辭長作嶺南人

遷居

并引

吾紹聖元年十月十二日至惠州寓合江樓是月十八日遷於嘉祐寺二年三月十九日復遷於合江樓三年四月二十日復歸於嘉祐寺時方卜築白鶴峰之上新居成庶幾其少安乎

前年家水東回首夕陽麗去年家水西溼面風雨細東西兩無擇緣盡我輒逝今年復東徙舊館聊一憩已買

白鶴峰規作終老計長江在北戶雪浪舞吾砌青山滿
牆頭髮鬢幾雲髻雖抱朴子金鼎陋蟬蛻猶賢抑抑
州廟俎薦丹荔吾生本無待俯仰了此世念念自成劫
塵塵各有際下觀生物息相吹等蚊蚋

柳州貶謫詩多憂鬱淒楚之音軾嘗評其南礪中詩引
老杜云王侯與螻蟻同盡隨丘墟儀曹何憂之深也若
惠州諸作無不寬然有餘地此其所得深矣

軾和陶集曰去歲三月自水東嘉祐寺遷合江樓迨

今一年多病鮮歡頗懷水東之樂得歸善縣後隙地
數畝父老云此古白鶴觀也意欣然欲居之 白鶴
峰新居成自嘉祐寺遷入詠淵明時運詩云斯晨斯
夕言息其廬似為余發也

兩橋詩

并引

惠州之東江谿合流有橋多廢壞以小舟渡羅浮道
士鄧守安始作浮橋以四十舟為二十舫鐵鎖石矸
隨水漲落榜曰東新橋州西豐湖上有長橋屢作屢

壞栖禪院僧希固築進兩岸為飛樓九間盡用石鹽
木堅若鐵石榜曰西新橋皆以紹聖三年六月畢工
作二詩落之

東新橋

羣鯨貫鐵索背負橫空霓首揺翻雪江尾挿崩雲谿機
牙任信縮漲落隨高低轆轤卷巨索青蛟挂長堤奔舟
免狂觸脫筏防撞擠一橋何足云謹傳廣東西父老有
不識喜笑爭攀躋魚龍亦驚逃雷電生馬蹏嗟此病涉

久公私困留稽姦民食此險出沒生鳧驚似賣失船壺
如去登樓梯不知百年來幾人隕沙泥豈知濤瀾上安
若堂與閨往來無晨夜醉病休扶攜使君飲我言妙割
無牛雞不云二子勞歎我捐腰犀

自注二士造橋
予嘗助施犀帶

我亦

壽使君一言聽扶藜常當修未壞勿使後噬臍

先寫浮橋之狀次言橋成之利而以常當修未壞終之
驚采絕艷直是為浮橋作贊頌前賢詩中無此崛奇

西新橋

昔橋木千柱挂湖如斷霓浮梁陷積淖破板隨奔谿笑
看遠岸沒坐覺孤城低聊因三農隙稍進百步隄炎州
無堅植潦水輕推擠千年誰在者鐵柱羅浮西獨有石
鹽木白螳不敢躋似開銅駝峰如鑿鐵馬蹏岌岌類鞭
石山川非會稽嗟我久閣筆不書紙尾驚蕭然無尺箠

欲構飛空梯百夫下一杙椽此百尺泥

自注橋柱石碌之下皆有堅木

椽入泥中大餘謂之頂椿

採囊賴故侯寶錢出金閨

自注子由之婦史頃入內得賜

黃金錢數十以助施

父老喜雲集簞壺無空攜三日飲不散殺盡

西村難似聞百歲前海近湖有犀

自注橋下舊名鰐湖蓋嘗有鰐鱓之類

那知陵谷變枯瀆生芟藜後來勿忘今冬涉水過臍

序記事跡與東橋體格不同而波瀾意度曲折恣肆獨以和韻顯其奇

白鶴峰新居欲成夜過西鄰翟秀才二首

林行婆家初閉戶翟夫子舍尚留關連娟缺月黃昏後
縹緲新居紫翠間繫悶豈無羅帶水割愁還有劍鋌山

自注韓退之云水作青羅帶山如碧玉簪柳子厚云海上尖峰若劍鋌秋來處處割愁腸皆嶺南詩也

中

原北望無歸日鄰火村春自往還

甕間畢卓防偷酒壁後匡衡不點燈待鑿平江百尺井
要分清暑一壺冰佐卿恐是歸來鶴次律寧非過去僧
他日莫尋王粲宅夢中來往本何曾

首作兀傲鮮妍揮毫卓犖次作以意貫串故役事繁而
思不隔不善學之不轉成點鬼簿耶

石林詩話曰詩篇當有操縱不可拘用一律蘇子瞻
詩林行婆家初閉戶翟夫子舍尚留關始讀殆不可

測其意蓋下有連娟缺月四句則入頭不怕放行寧
傷初拙也

縱筆

白頭蕭散滿霜風小閣藤牀寄病容
報道先生春睡美道人輕打五更鐘

王十朋曰按此詩執政聞而怒之再貶僊耳

種茶

松間旅生茶已與松俱瘦茨棘尚未容
蒙翳爭交構天

公所遺棄百歲仍稚幼紫笋雖不長孤根乃獨壽移栽
白鶴嶺土軟春雨後彌旬得連陰似許晚遂茂能忘流
轉苦戢戢出鳥味未任供白磨且可資摘嗅千團輸大
官百餅銜私闕何如此一啜有味出吾囿

茶根移種經雨而生謫居殆用自況故曰天公所遺棄
曰能忘流轉苦詞旨了然可見

白鶴山新居鑿井四十尺遇磐石石盡乃得泉

海國困蒸溽新居利高寒以彼陟降勞易此寢處乾但

苦江路峻常慙汲腰酸矻矻煩四夫硤硤斷層巒彌旬
得尋丈下有青石磐終日但迸火何時見飛瀾豐我聚
與醪利汝椎與鑕山石有時盡我意殊未闌今朝僮僕
喜黃土復可搏晨瓶得雪乳莫甕停冰湍我生類如此
何適不艱難一勺亦天賜曲肱有餘歡

艱難二字為通首點睛處借題抒寫奧美無窮

三月二十九日二首

南嶺過雲開紫翠北江飛雨送淒涼酒醒夢回春盡日

閉門隱几坐燒香

門外橘花猶的皦
牆頭荔子已爛斑
樹暗草深人靜處
捲簾歌枕卧看山

吾謫海南子由雷州被命即行了不相知至梧廼
聞尚在藤也旦夕當追及作此詩示之

九疑聯縣屬衡湘
蒼梧獨在天一方
孤城吹角烟樹裏
落日未落江蒼茫
幽人拊枕坐歎息
我行忽至舜所藏
江邊父老能說予
白頭紅頰如君長
莫嫌瓊雷隔雲海

聖恩尚許遙相望平生學道真實意豈與窮達俱存亡
天其以我為箕子要使此意留要荒他年誰作輿地志
海南萬古真吾鄉

水天景色離合情懷極排解乃極沉痛

鶴林玉露曰子瞻謫儋州子由謫雷州皆章惇取其
字之偏傍而謔之當時有術士曰儋字從立人子瞻
其北歸乎雷字雨在田上承天之澤子由其未艾乎
後皆驗

行瓊儋間肩輿坐睡夢中得句云千山動鱗甲萬
谷酣笙鐘覺而遇清風急雨戲作此數句

四州環一島百洞蟠其中我行西北隅如渡月半弓登
高望中原但見積水空此生當安歸四顧真途窮眇觀
大瀛海坐詠談天翁茫茫太倉中一米誰雌雄幽懷忽
破散永嘯來天風千山動鱗甲萬谷酣笙鐘安知非羣
仙釣天宴未終喜我歸有期舉酒屬青童急雨豈無意
催詩走羣龍夢雲忽變色笑電亦改容應怪東坡老顏

哀語徒工久矣此妙聲不聞蓬萊宮

行荒遠僻陋之地作騎龍弄鳳之思一氣浩歌而出天
風浪浪海山蒼蒼足當司空圖豪放二字

苕溪漁隱叢話曰幽懷忽破散四句蓋風來則千山
草木俱動如動鱗甲萬谷號呼有聲如酣笙鏞耳

次前韻寄子由

我少即多難遭回一生中百年不易滿寸寸彎強弓老

矣復何言榮辱今兩空泥洹尚一路

自注古語云十方薄伽梵一路涅槃

門梵語泥洹
此云涅槃

所向餘皆窮似聞崆峒西仇池迎此翁胡
為適南海復駕垂天雄下視九萬里浩浩皆積風回望
古合州屬此琉璃鐘離別何足道我生豈有終渡海千
年歸方鏡照兩童還鄉亦何有暫假壺公龍峨眉向我
笑錦水為君容天人巧相勝不獨數子工指點昔遊處
蒿萊生故宮

其胸次實為天空海濶非是無聊解免之詞

遷居之夕聞鄰舍兒誦書欣然而作

幽居亂鼃黽生理半人禽
楚然已可喜況聞弦誦音
兒聲自圓美誰家兩青衿
且欣集齊咻未敢笑越吟
九齡起韶石姜子家日南
吾道無南北安知不生今
海濶尚挂斗天高欲橫參
荆榛短墻缺燈火破屋深
引書與相和置酒仍獨斟
可以侑我醉琅然如玉琴

謫居荒陋聞誦讀而欣然
乃是恒情所同最愛海濶
數句寫出一時情景別具
興會文彩欲飛

觀碁

予素不解碁嘗獨游廬山白鶴觀觀中人皆闔戶晝
寢獨聞碁聲於古松流水之間意欣然喜之自爾欲
學然終不解也兒子過廼羸能者僭守張中日從之
戲予亦隅坐竟日不以為厭也

五老峰前白鶴遺趾長松蔭庭風日清美我時獨游不
逢一士誰歟碁者戶外屨二不聞人聲時聞落子紋枰
坐對誰究此味空鉤意釣豈在魴鯉小兒近道剝啄信
指勝固欣然敗亦可喜優哉游哉聊復爾耳

軾嘗論司空圖棊聲花院閉幡影石幢高之句以為吾
嘗獨入白鶴觀松陰滿地不見一人惟聞棊聲然後知
此句之工但恨其寒儉有僧態數語可謂定評矣此四
言一章則甚似規撫二十四品之文者清幽靜妙真得
味外之味然何嘗帶一毫寒儉氣耶

深雪偶談曰四言自韋孟司馬遷相如班固束皙陶
潛韓愈柳宗元梅堯臣歐陽修王安石蘇軾工拙畧
見嘗怪五言而上世人往往極其才之所至而四言

雖文詞鉅伯輒不能工水心有是言矣劉潛夫亦以
四言尤難三百五篇在前之故余思四言如律以三
百五篇則韋氏為工世殊體異後之銘詩莫非四言
也安石以上諸公未暇深論如蘇公所撰范蜀公誌
銘余每展卷輒為擊節在僊耳作觀碁詩其寂寒冷
落之味可以想見坡公四言於古近體中句語無適
而不高妙也

因學紀聞曰觀碁詩誰歟碁者用檀弓文法

苔溪漁隱叢話曰夢得觀碁歌云初疑磊落曙天星
次見搏擊三秋兵雁行布陣衆未曉虎穴得子人皆
驚余嘗愛此數語能摹寫奕碁之趣夢得必高於手
談也至東坡觀碁則云勝固可欣敗亦可喜優哉游哉
聊復爾耳蓋東坡素不解碁不究此味也

糴米

糴米買束薪百物資之市不緣耕樵得飽食殊少味再
拜請邦君願受一廛地知非笑昨夢食力勉內愧春秧

幾時花夏稗忽已穠
悵馬撫耒耜誰復識此意

此與陶潛詩云田家豈不苦弗獲辭此難四體誠乃疲
庶無異患干同為學道有得之語

摘菜

并引

吾借王參軍地種菜不及半畝而吾與過子終年飽
菜夜半飲醉無以解酒輒摘菜煮之味含土膏氣飽
風露雖梁肉不能及也人生須底物而更貪耶乃作

四句

秋來霜露滿東園蘆葍生兒芥有孫我與何曾同一飽
不知何苦食雞豚

見到之言不嫌直遂

次韻子由月季花再生

幽芳本長春暫瘁如蝕月且當付造物未易料枯枿也
知宿根深便作紫笋茁乘時出婉婉為我暖栗烈先生
蚤貴重廟論推英拔而今城東瓜不記召南茨陋居有
遠寄小圃無濶躡還為久處計坐待行年匝

自注子由
明年六十

臘果綴梅枝春杯浮竹葉誰言一萌動已覺萬木活聊

將玉蘂新

自注世謂此玫瑰花也

挿向綸巾折

誰言一萌動二語覺春風太和自在襟抱間

次韻子由浴罷

理髮千梳淨風晞勝湯沐閉息萬竅通霧散名乾浴顏

然語默喪靜見天地復時令具薪水漫欲濯腰腹陶匠

不可求盆斛何由足

自注海南無浴器故常乾浴而已

老鷄卧糞土振

羽雙瞋目倦馬馱風沙奮鬣一噴玉垢淨各殊性快愜

聊自沃雲母透蜀紗琉璃瑩新竹稍能夢中覺漸使生
處熟楞嚴在牀頭妙偈時仰讀反流歸照性獨立遺所
矚未知仰山禪已就季主卜安心會自得助長毋相督
觸處圓通了無罣礙

十二月十七日夜坐達曉寄子由

燈燼不挑垂暗藥爐灰重撥尚餘薰清風欲發鴉翻樹
缺月初升犬吠雲閉眼此心新活計隨身孤影舊知聞
雷州別乘應危坐跨海幽光與子分

淒寂之境寫得難大皆仙超然元著

子由生日

上天不難知好惡與我一方其未定間人力破陰隲小
忍待其定報應真可必季氏生而仁觀過見其實端如
柳下惠焉往不三黜天有時而定壽考未易畢兒孫七

男子

自注子由
三子四孫

次第皆逢吉遙知設羅門獨掩懸磬室

回思十年事無愧篋中筆但願白髮兄年年作生日

語語朴摯祝頌乃弟之體故當如是

以黃子木拄杖為子由生日之壽

靈壽扶孔光菊潭飲伯始雖云閒草木豈樂蒙此耻一時偶收用千載相瘢痂海南無嘉植野果名黃子堅瘦多節目天材任操倚嗟我始剪裁世用或緣此貴從老夫手往配先生兒相從歸故山不愧仙人把

自注本草枸杞一名

仙人杖

從老夫手配先生兒嗟余寡兄弟四海一子由此語老而益信

儋耳

霹靂收威莫雨開獨憑欄檻倚崔嵬垂天雌霓雲端下
快意雄風海上來野老已歌豐歲語除書欲放逐臣回
殘年飽飯東坡老一壑能專萬事灰

嶮嶮雄姿經挫折而不稍損抑養浩然之氣於此見其
心聲

蘇轍曰東坡居士謫居儋耳實家羅浮之下獨與幼
子過負擔渡海葺茅竹而居之日啗諸芋而華屋玉

食之念不存於胸中平生無所嗜好以圖史為園囿
文章為鼓吹至是亦皆罷去猶獨喜為詩精深華妙
不見老人哀憊之氣

馮景曰唐書吳武陵與孟簡書云雷硤電射天怒也
不能終朝柳宗元之貶已十二年矣聖人在上安有
畢世而怒人臣耶公起句暗用其意

新居

朝陽入北林竹樹散疎影短籬尋丈間寄我無窮境舊

居無一席逐客猶遭屏結茅得茲地翳翳村巷永數朝
風雨涼畦菊發新穎俯仰可卒歲何必謀二頃

幸得一廛蕭條高寄仁智所樂不勝娛衆散賞非夫澄
懷觀道曷克有此

軾答程全父推官書曰初至僦官屋數椽近復遭迫
逐不免買地結茅僅免露處而囊為一空困厄之中
何所不有置之不足道聊為一笑而已

施元之曰東坡至儋耳軍使張中請館於行衙又別

飾官舍為安居計朝廷命湖南提舉常平董必者察
訪廣西遣使臣過海逐出之中坐黜死雷州監司悉
鐫秩遂買地築室為屋五間潮人王介石為客於儋
躬泥水之役其勞甚於家隸故詩有逐客猶遭屏句

倦夜

倦枕厭長夜小牕終未明孤村一犬吠殘月幾人行
良鬢久已白旅懷空自清荒園有絡緯虛織竟何成

虛廓寂寥具臻妙境

縱筆三首

錄一首

寂寂東坡一病翁
白須蕭散滿霜風
小兒誤喜朱顏在
一笑那知是酒紅

容齋五筆曰
樂天詩云
醉貌如霜葉
雖紅不是春
坡則曰
小兒誤喜朱顏在
一笑那知是酒紅
采舊公案而機杼一新
前無古人
於是為至

貧家淨掃地

貧家淨掃地
貧女好梳頭
下士晚聞道
聊以拙自修
扣

門有佳客一飯相邀留春炊勿草草此客未易媿慎勿
用勞薪感我如薰猶德人抱衡石銖黍安可廢

起二語瞥空而入是詩家興體

庚辰歲人日作時聞黃河已復北流老臣舊數論

此今斯言乃驗二首

錄一首

老去仍棲隔海村夢中時見作詩孫天涯已慣逢人日
歸路猶欣過鬼門三策已應思賈讓孤忠終未赦虞翻
典衣剝買河源米屈指新筍作上元

方回曰前輩論詩文謂子美夔州後詩東坡嶺外文
老筆愈勝少作而中年亦未若晚年也此詩元符三
年東坡年六十五謫居儋耳所作人曰鬼門之對極
工

劉辰翁曰夢中時見作詩孫此句為仲虎發也陸務
觀云在蜀見蘇山藏公墨迹疊韻詩後題云寄作詩
孫符符字仲虎

施元之曰神宗元豐四年澶州言河決小吳埽詔東

行河道已填淤不可復更不修閉哲宗元祐三年安
燾等疏議回河東流文忠烈呂正愍從而和之力主
其議子由在西掖言於呂正獻曰河決而北先帝不
能回而諸公欲回之是自謂過先帝也正獻曰當與
公籌之然竟莫能奪其役遂興議論紛然至於累歲
公嘗侍上讀祖宗寶訓因及時事曰黃河勢方北流
而強之使東當局者恨之老臣舊數論此指此事也
庚辰歲正月十二日天門冬酒熟予自漉之且漉

且嘗遂以大醉二首

錄一首

自撥牀頭一甕雲幽人先已醉濃芬天門冬熟新年喜

麴米春香並舍聞

自注杜子美詩云聞道雲安麴米春蓋酒名也

菜圃漸疎花

漠漠竹扉斜掩雨紛紛擁裘睡覺知何處吹面東風散

續文

花雨於醉中見之別饒情趣

汲江煎茶

活水還須活火烹

自注唐人云茶須緩火炙活火煎

自臨釣石取深清

大瓢貯月歸春甕小杓分江入夜鉗茶雨已翻煎處腳
松風忽作瀉時聲枯腸未易禁三椀坐聽荒城長短更
舒促離合若風湧雲飛楊萬里輩曲為疏解似反失其
趣指

苕溪漁隱叢話曰此詩奇甚道盡烹茶之要且茶非
活水則不能發其鮮馥東坡深知此理矣

楊萬里曰東坡煎茶詩云活水還須活火烹自臨釣
石汲深清第二句七字而具五意水清一也深處取

清者二也石下之水非有泥土三也石乃釣石非尋
常之石四也東坡自汲非遣卒奴五也大瓢貯月歸
春甕小杓分江入夜瓶其狀水之清美極矣分江二
字此尤難下雪乳已翻煎處腳松風忽作瀉時聲此
倒語也尤為詩家妙法即少陵紅稻啄餘鸚鵡粒碧
梧棲老鳳凰枝也枯腸未易禁三椀卧聽山城長短
更又翻却盧仝公案全喫到七椀坡不禁三椀山城
更漏無定長短二字有無窮之味

予來僭耳得吠狗曰烏背甚猛而馴隨予遷合浦
過澄邁泗而濟路人皆驚戲為作此詩

烏啄本海獒幸我為之主食餘已瓠肥終不憂鼎俎晝
馴識賓客夜悍為門戶知我當北還掉尾喜欲舞跳浪
趁童僕吐舌喘汗雨長橋不肯躡徑渡清深浦拍浮似
鵝鴨登岸劇虓虎盜肉亦小疵鞭箠當貫汝再拜謝厚
恩天不遣言語何當寄家書黃耳定乃祖

一時戲筆摹繪入情至盜肉亦小疵鞭箠當貫汝一句

其寓意者深矣

澄邁驛通潮閣二首

倦客愁聞歸路遙
眼明飛閣俯長橋
貪看白鷺橫秋浦
不覺青林沒晚潮

餘生欲老海南村
帝遣巫陽招我魂
杳杳天低鵲沒處
青山一髮是中原

羈望深情含蘊無際

苔溪漁隱叢話曰通潮閣詩云杳杳天低鵲沒處青

山一髮是中原伏波將軍廟碑有云南望連山若有
若無杳杳一髮耳其語倔奇兩用之蓋得意也

六月二十日夜渡海

參橫斗轉欲三更苦雨終風也解晴雲散月明誰點綴
天容海色本澄清空餘魯叟乘桴意麤識軒轅奏樂聲
九死南荒吾不恨茲遊奇絕冠平生

高濶空明非實身有仙骨莫能有其隻字

方回曰紹聖四年丁丑東坡在惠州年六十二矣五

月再謫瓊州別駕昌化軍安置即儋耳也以六月二十日夜渡海七月十三日至儋州或謂尾句太過無省愆之意殊不然也章子厚蔡卞欲殺之而處之怡然當此老境無怨無怒以為茲遊奇絕真了生死輕得喪天人也

次韻王鬱林

晚塗流落不堪言海上春泥手自翻
漢使節空餘皓首故侯爪在有頽垣
平生多難非天意此去殘年盡主恩

誤辱使君相杖拭寧聞老鶴更乘軒

忠厚悱惻大雅遺音

藤州江下夜起對月贈邵道士

江月照我心江水洗我肝端如徑寸珠墮此白玉盤我心本如此月滿江不湍起舞者誰歟莫作三人看嶠南瘴毒地有此江月寒乃知天壤間何人不清安牀頭有白酒盞若白露漙獨醉還獨醒夜氣清漫漫仍呼邵道士取琴月下彈相將乘一葉夜下蒼梧灘

舒元興序白一篇只辦形容擬議猶是日下孤燈伎倆
此詩乃能証出妙明心直是照天照地

廣倅蕭大夫借前韻見贈復和答之二首

錄一首

生還麤勝虞蚤退不如疎垂死初聞道平生誤信書風
濤驚夜半疾病送災餘賴有蕭夫子幽懷得少攄

軾詩好用古人姓壓韻前人有譏之者若此詩起二句
亦是習氣未除而格韻則高堅於晚節矣

次韻韶倅李通直二首

錄一首

一篇瀧吏可書紳莫向長沮更問津老去常憂伴新鬼
歸來且喜是陳人曾陪令尹蒼髯古又見郎君白髮新
回首天涯一惆悵卻登梅嶺望楓宸

李伯時畫其弟亮功舊隱宅圖

樂天蚤退今安有摩詰長閒古亦無五畝自我池上竹
十年空看輞川圖近聞陶令開三徑應許揚雄寄一區
晚歲與君同活計如雲鵝鴨散平湖

池上承樂天句輞川承摩詰句陶令比李揚雄自喻一

意直下舒展自如斯為律詩神境

贈嶺上老人

鶴骨霜髯心已灰青松合抱手親栽問翁大庾嶺頭住
曾見南遷幾箇回

高朗得青蓮之一體

娛書堂詩話曰東坡還至庾嶺上少憩村店有一老
翁出問從者曰官為誰曰蘇尚書曰是蘇子瞻歟曰
是也乃前揖坡曰我聞人害公者百端今日北歸是

天祐善人也東坡笑而謝之因題此詩於壁

予昔過嶺而南題詩龍泉鐘上今復過而北次前

韻

秋風卷黃落朝雨洗綠淨人貪歸路好節近中原正下
嶺獨徐行艱嶮未敢忘遙知叔孫子已致魯諸生

刻意斲削節短而味長

陸游曰建中初韓曾二相得政盡收用元祐人其不
召者亦補大藩惟東坡兄弟猶領宮祠末句蓋寓所

謂不能致者二人意深語緩尤未易窺測

過嶺二首

暫著南冠不到頭卻隨北雁與歸休平生不作兔三窟
今古何殊貉一丘當日無人送臨賀至今有廟祀潮州
劍關西望七千里乘興真為玉局游

七年來往我何堪又試曹溪一勺甘夢裡似曾遷海外
醉中不覺到江南波生濯足鳴空澗霧繞征衣滴翠嵐
誰遣山鷄忽驚起半崑花雨落毵毵

視遷謫猶醉夢中知其胸中別有澄定者在

方回曰紹聖元年甲戌貶惠州四年丁丑貶儋耳明
年元豐戊寅改元三年庚辰量移廉州永州自便凡
七年楊憑貶臨賀尉惟徐晦送之此事極切夢裏似
曾遷海外此聯甚佳殊不以遷謫為意也

留題顯聖寺

渺渺疎林集晚鴉孤村烟火梵王家幽人自種千頭橘
遠客來尋百結花浮石已乾霜後水焦坑閒試雨前茶

祇疑歸夢西南去翠竹江村遠白沙

歇白塔鋪

甘山廬阜鬱長望林隙依稀漏日光吳國晚蠶初斷葉
占城蚤稻欲移秧迢迢澗水隨人急冉冉巖花撲馬香
望眼儘從飛鳥遠白雲深處是吾鄉

鬱孤臺

自注再過虔
州和前韻

吾生如寄耳嶺外亦閒游贛石三百里寒江尺五流楚
山微有霰越瘴久無秋望斷橫雲嶠魂飛咤雪洲曉鐘

時出寺暮鼓各鳴樓歸路迷千嶂勞生閱百州不隨猿
鶴化甘作賈胡留祇有貂裘在猶堪買釣舟

深穩之至彌出清新 吾生如寄耳一句集中屢見其
橫溢固不屑屑於此也

次韻江晦叔二首

錄一首

鐘鼓江南岸歸來夢自驚浮雲世事改孤月此心明雨
已傾盆落詩仍翻水成二江爭送客木杪看橋橫

冲襟內益見於文詞無不遽然入理

苔溪漁隱叢話曰東坡自嶺外歸次韻江晦叔云浮
雲世事改孤月此心明語意高妙如參禪悟道之人
吐露胸襟無一毫窒礙也

困學紀聞曰浮雲世事改孤月此心明坡公晚年所
造深矣更無柳絮隨風起惟有葵花向日傾見司
馬公之心浮雲世事改孤月此心明見東坡公之心
寒日與器之游南塔寺寂照堂

城南鐘鼓鬪清新端為投荒洗瘴塵總是鏡空堂上客

誰為寂照境中人紅英掃地風驚曉綠葉成陰雨洗春
記取明年作寒食杏花曾與此翁鄰

花落木榮不言人事而人事之變遷自見寄慨良深

贈詩僧道通

雄豪而妙苦而腴祇有琴聰與蜜殊

自注錢塘僧思聰總角善琴後捨琴

而學詩復棄詩而學道其詩似皎然而加雄放安州
僧仲殊詩敏捷立成而工妙絕人殊辟教常喫蜜語

帶烟霞從古少

自注李太白云他人之文如山無烟霞春無草木

氣含蔬筍到

公無

自注謂無酸餽氣也

香林乍喜聞蒼筍古井惟慙斷轆轤為

報韓公莫輕許從今島可是詩奴

氣含蔬筍祇是以諧語入詩遂成千古名論世之開堂
為人者能得斯意定知兔園四六敗麗時文撮合補綴
不足為支那撰述而具正法眼藏者即如不搽紅粉也
風流只要檀郎認得聲等句皆為解第一義也

石林詩話曰唐詩僧中葉以後其名字班班為時所
稱者甚多然詩皆不傳如經來白馬寺僧到赤烏年
數聯僅見文士所錄而已陵遲至貫休齊己之徒其

詩雖存然無足言矣中間惟皎然最為傑出故其詩
十卷獨全亦無甚過人處近世僧學詩者極多皆無
超然自得之氣往往反拾掇摸倣士大夫所殘棄又
自作一種體格律尤凡俗世謂之酸餽氣予瞻贈惠
通詩云語帶烟霞從古少氣含蔬筍到公無嘗語人
曰頗解蔬語否為無酸餽氣也聞者莫不大笑

西清詩話曰東坡言僧詩要無蔬筍氣固詩人龜鑑
今時誤解便作世網中語殊不知本分家風水邊林

下氣象蓋不可無若盡洗去清拔之韻便與俗同科
又何足尚

竹坡詩話曰思聰杭州孤山僧東坡倅杭令和參寥
子昏字韻詩云千點亂山橫紫翠一鉤新月掛黃昏
大加稱賞大觀政和間俠琴游梁日登中貴人之門
久之遂還俗為御前使臣方其將冠巾也蘇叔黨因
浙僧入都送之詩云試誦北山移為我招琴聰詩至
已無及矣

予昔作壺中九華詩其後八年復過湖口則石已
為好事者取去乃和前韻以自解云

江邊陣馬走千峰問訊方知冀北空尤物已隨清夢斷

自注劉夢得以九
華為造物一无物

真形猶在畫圖中

自注道藏有五岳真形圖

歸來

晚歲同元亮卻掃何人伴敬通賴有銅盆修石供仇池

玉色自璵璠

自注家有銅盆貯仇池石正綠色有洞水
達皆予人嘗以怪石供佛印師作怪石供

篇一

次韻郭功甫二首

錄一首

蚤知臭腐即神奇海北天南總是歸
九萬里風安稅駕雲鵬今悔不卑飛

以摘宦為搏扶擬卑飛於厚祿偶露不平之鳴翻案獨絕

林子仁曰功甫觀先生畫雪雀有感作詩寄惠州云
平生才力信瑰奇今在窮荒豈易歸正似雪林枝上
畫羽翰雖好不能飛後先生北歸人用前韻寄詩云
秋霜春雨不同時萬里今從海外歸已出網羅毛羽

在却尋雲跡帖天飛今次其韻也

宋復古畫瀟湘晚景圖三首

西征憶南國堂上畫瀟湘
照眼雲山出浮空野水長
舊游心自省信手筆都忘
曾有衡陽客來看意渺茫

落落君懷抱山川自屈蟠
經營初有適揮灑不應難
江市人家少烟村古木攢
知君有幽意細細為尋看

咫尺殊非少陰晴自不齊
徑蟠趨後崦水會赴前溪
自說非人意曾經入馬蹏
他年宦遊處應話劍山西

首篇言畫之梗概終篇言畫之曲折中篇乃以前四句承上後四句起下結構森嚴不但霞絢冰瑩獨標瓌頽

嘲子由

堆几盡埃簡攻之如蠹蟲誰知聖人意不在古書中
正是讀書萬卷人語不悅學者不能道通雅稱馮開之
云讀書太樂則漫太苦則澁董遇之百遍考亭之半日
淵明之不求甚解東坡之每事一過其各得於輪扁之
甘苦者乎數語可為此詩注腳

第五橋

白露淒風洗瘴烟夢回相對兩淒然
雀羅廷尉非當日
鳩杖先生愈少年
世事飽諳思縮手
主恩未報耻歸田
誰憐第五橋東水
獨照台州老鄭虔


五六一聯詞意深厚

軒牕

東鄰多白楊
夜作雨聲急
牕下獨無眠
秋蟲見燈入

魚

湖上移魚子初生不畏人自從識鉤餌欲見更無因



御選唐宋詩醇卷四十一